



**SPEZI
CLIQUE
1905
JUNGI
GARDE**

SINCE 1925

Jetze sinn miir gwiss ganz hundert*

Yalla - jetz isch ääs aso sowit
und daas isch scho heavy shit,
miir sinn hundert Jeerli alt
dr «Rimuss» stoot scho lengschtens kalt,
d Korke leen miir jetz loo gnalle
dass es heersch bis uf Sanggalle,
jetz wird gfeschtet as gääbs kai Moorge
so vergissisch alli Soorge.
In de goldige 20er het me is grindet kaa
gwiis vo eme coole Eeremaa,
glich alt wie d Migros sinn mer au
daas macht is stolzer als e Pfau,
sinn au eher sälte lost
unser dehai isch Baasel Osch,
bi uns sinn alli willkomme - ooni Hoon
ob NPC, Zircher oder Talahon.

Apropos Zircher die mien unde duure
hänn nimm so e groossi Schnuure,
d Stimmig isch myys am Limmatquai
fascht so wie bi dr Basler Bolizei.
Wie jeedes Joor wänn si iir Feschkli fyyre
gheersch aber kaini Ressler wyyhre,
si kenne iire Schneemaa nit aazinde
denn es duet e bitzli winde.
Hyyle heersch si au will dr ESC
nit stattfindet an iirem Ziri-See,
d Bangge sinn hyt au nimm s glyyche
do kasch nimm so viil Boni iistryyche,
au zaale si fascht dr ganzi Loon
fir zwai Zimmer in Wiedikon,
gäärn wette si au e nei Fuessball-Stadion baue
doch daas dien d Aawooner ständig versaue,
e Drooscht isch aber - ääs wird bunt
as d Taylor Swift zumindescht kunnt.

Au so bits e groosse Saich
braut sich zämme - ääne am groosse Daich,
es macht is alli e bits baff
si wäale scho wider dr bleedschti Aff.
Doch daas steert kaine deert ääne
Angscht ha mien jetzt aber d Däne,
denn äär will Greenland annektiere
bhauptet andri dien Hindli diniere,
bestiggt si Kabinett mit de greeschte Lappis
äär isch fescht dr Meinig jo so glappis,
doo gseesch nit nur als Realischt
nit nur uf Temu gits billige Misch.
Scharf gschosse wird au bi syne Rede
jo doo seet jo au graad jeede,
dr Schuss uff in - s isch kai Sääge
isch halt wie äär – aifach lyycht drnäabe.

Hundert Jeerli hänn miir uf em Buggel
s isch aber nimm wie friener nundebuggel,
denn hitte deerfsch jo au nit mee
doo saage miir ojeminee.
Wotts z Baasel im Haafe mit dim Kaare
e bitseli go ummefaare,
said schnäll e Schugger resoluut
daas darfsch doo nit daas isch mer z lut.
Oder bisch am Wienachtsmäärt
und noni grad so seer woolgnäart,
denn kasch ääs aber au graad vergässe
im Minschter go dini Brootwuurscht frässe,
i wett i hätt e Glettybrätt
steert daas dr Liebgott bim Gebätt?,
und wotts denn no e Schlugg us dinere Fläsche haa
hets Gopferdeggeli e Deggel draa.
Oder duesch am Theaater schaffe
und äs kunnt ein go gaffe,
wo denn in dr Zytig schryybt
dini Ufffierig seg e bitsli shit,
denn darfsch di hitte nimm loo dryybe
und in mit Hundegagg yyrybe.
Oder wotts emol go schiesse
und daas au so richtig gniese,
gits e Shitstorm - Gopferdechere
wennd usversee dr Jeessus duesch duurlechere.
Oder wotts emol e Initiative iireiche
aber äs duet di ganz Zyt saiche,
denn muesch drotzdäm uf dr Strooss go sammle
und kasch nit dehai ummegammle,
denn es hinderloot e Biigschmagg e faale
wenn dä duesch fir Unterschrifte zaale.
Duet sich in Muttenz e Speiz vo dym Muul drenne
kunnt ganz gschnäll e Schugger z renne,
denn duesch deert uf e Boode spugge
duet sich denn dä Schugger bugge,
und said was isch daas do bi mim Fuess
daas git e ganz e saftigi Buess.
Oder schaffsch bi dr BVB
und es het e weeneli Schnee,
dänggsch ihr kennet miir jetz alli am Aarsch lägge
denn daas ka kai Gaiss wäggschlägge,
faarsch denn zrug ins Depot mit dim Bus
raschte alli Lyt grad us.

Als Ueli zien miir stolz dur d Stadt
seen uns an dr Fasnacht niemols satt,
Naare sinn miir allerdings nit
denn do muesch gar nit so wyt,
hets uf dere Wält scho gnue
miir hoffe die gän gly alli mool Rue.
Sid unser Grindig hänn miir villes iberläbt
E Wältkrieg, d Eelkrise – Respägg!,
au d Dotcom-Blöse het is nit kenne mache
miir dien immer wyter mache,
fiire d Fasnacht wie si isch
halt ebbe kli spezi-fisch,
sinn mit Lyyb und Seel drbyy
fir uns isch immer no glaar «stolz e Spezi z syy».

*Dä Zeedel ka Spuure vo Juugendsprooch enthalte.